

Li tenamit Watemaal tento tixsach xwanjik li tz'eqtaanank sa' xb'een xtenamiteb' laj ralch'och', chank laj tz'ilonel ix re li ONU

GINEBRA (11 xb'e li po Mayo re li chihab' 2018) – Laj tz'ilol ix re li ONU, chi rix xk'ulub' xtenamiteb' laj ralch'och', qana' Victoria Tauli-Corpuz, kixjultika li xk'a'uxl sa' xk'ab'a' li tz'eqtaanank ut muxe'k nake'xk'ul xtenamiteb' laj ralch'och' re li tenamit Watemaal, sa' xk'ab'a' xnumtajenaqil li neb'a'il, xmajelil li tzekemq, risinkileb' sa' li xch'och'eb', naq nake'mine' ru chi elk sa' junaq ch'och' malaj na'ajej ut naq nake'majewaak xb'aan li chaq'rab'.

“Maak'ajo' tz'aqal link'a'uxl sa' xk'ab'a' naq yook chi numtaak xmajelil li juntaq'eetilal nak'ulmank sa' li tenamit, jo'kan aj wi' rik'in naq li awa'b'ejjal maajoq'e naru chi xkotzb'al malaj chi risinkil li tz'eqtaanank, chi moko naxk'e ta xtuminal re naq twanq k'anjelak chi rix li na'leb' yookeb' xk'ulb'al xtenamiteb' laj ralch'och'”, cha'ank qana' Tauli-Corpuz.

“Chi ru chaq linwanjik sa' li tenamit Watemaal, kinch'utami'k chaq rik'ineb' naab'al chi poyanam aj ralch'och', li ke'wank chaq risinkileb' sa' josq'il sa' li xna'ajeb' ut maak'a' nake'raj re li xpoyanamileb'. Jo'kan aj wi' kinwulak chi rula'ninkileb' naab'al aj ralch'och' aj k'amol b'e, li ke'wank xk'eeb'al sa' tz'alam sa' xk'ab'a' naq nake'tawe' kok' maak sa' xb'eeneb', ab'an xiikil naq nake'xnimob'resi ru ut sa' xk'aba' a'in nake'k'e' sa' tz'alam malaj yook xtz'ilb'aleb' rix xb'aan chaq'rab' chi ru naab'al kutank”.

“Li tz'aqal yook chi k'amok chaq re li rahilal a'an xmajelal li ch'och', maak'a' li na'ajej. Li tenamit Watemaal ink'a' naxsik' xchaq'rab'il chi moko xb'ehil chank ru truhanq xkolb'al rix xk'ulub' xtenamiteb' laj ralch'och' chi rix xtz'aqonikeb' rik'in li ch'och', na'ajej ut choxach'och'. Naab'al kanab'anb'ileb' sa' li majelal chi moko nawank rilb'al k'a' ru li aajel ru cho'q reheb', wankeb' li k'anjel nake'wank xb'eeresinkil, ab'an moko nawank ta rab'inkil xk'a'uxl xtenamiteb' laj ralch'och', jo' rik'in rab'inkil b'ar wankeb' li raatin sa' xb'een li yook chi uxmank”.

“Wankeb' aj k'amol b'e aj ralch'och' nake'xyal xtz'ilb'al rix b'ar wank li ch'a'ajkilal ut nake'xyal xk'eeb'al chi ru chaq'rab' eb' li ch'a'ajkilal

nake'tawmank rik'in li ch'och', ab'an a'in yal xnimob'resinkil ru li ch'a'ajkilal naxb'aanu chi ru li tenamit. Aajel ru naq li tenamit Watemaal tixk'e reetal, tixsume ut tixtikib' k'anjelak chi rix eb' li ch'a'ajkilal a'in".

"Sa' xraqik nawaj xyeeb'al naq li tenamit Watemaal wank xk'as toj maji' naxtoj rik'in xtenamiteb' laj ralch'och', a'aneb' li ke'k'uluk re li rahob'tesiik sa' xk'ab'a' li kamsink ib' kiwank rik'in puub'", kixye aj wi', naru xyeeb'al naq ak xwank b'ayaq li k'anjelak chi rix rik'in xyeeb'al li resilal, xwank aj wi' xxaqab'ankil chi ru chaq'rab' li rahilal ke'xk'ul aran Sepur Zarco, ab'an toj yook chi ilmank naq maak'a' nakana wi' ut toj wank tuqub'aak traj, toj wank uxk traj".